



KOD ETIKA AMALAN PERUBATAN DALAM ISLAM

KEMENTERIAN KESIHATAN MALAYSIA

KOD ETIKA AMALAN PERUBATAN DALAM ISLAM

1. Pengenalan

Perkembangan bidang perubatan dan sains pada masa ini telah melalui proses revolusi dan mencapai kemajuan di dalam teknologi perubatan. Kemajuan ini perlu dimanfaatkan untuk kebajikan manusia dan perlu dibimbing agar tidak disalah guna pada masa akan datang di samping memastikan ilmu ini mengikut acuan yang ditetapkan oleh syarak.

2. Profesion Perubatan dan Perkhidmatan Kesihatan

- 2.1 Profesion perubatan adalah satu keperluan dalam masyarakat.
- 2.2 Menyediakan perkhidmatan perubatan merupakan satu fardu kifayah ke atas masyarakat yang boleh disempurnakan oleh individu atau masyarakat yang mempelajari ilmu perubatan.
- 2.3 Amalan perubatan adalah satu ibadah dan kebajikan, selain daripada salah satu kerjaya dalam mencari rezeki.
- 2.4 Menjaga nyawa, akal dan keturunan adalah prinsip Maqasid Syariah yang boleh dicapai melalui penjagaan kesihatan yang teratur.

3. Ciri-ciri Pengamal Perubatan

- 3.1 Ciri-ciri seorang pengamal perubatan seperti berikut:-
 - 3.1.1 Mempunyai ilmu perubatan dan diiktiraf untuk mengamal.
 - 3.1.2 Percaya kepada Allah, Tuhan sekalian alam.
 - 3.1.3 Menunaikan hak-hak Allah.
 - 3.1.4 Memahami keagungan Allah.
 - 3.1.5 Mentaati perintah Allah.
 - 3.1.6 Menjauhi larangan Allah dan mematuhi perintahNya ketika bersendirian atau di khalayak ramai.
 - 3.1.7 Memahami bahawa nyawa adalah milik Allah.
 - 3.1.8 Akur kepada perintah Allah supaya nyawa dan kesihatan dipelihara.
 - 3.1.9 Sentiasa berkeadaan tenang dan tidak gopoh.
 - 3.1.10 Mempunyai sikap bijaksana dan boleh memberi nasihat.
 - 3.1.11 Mempamerkan teladan yang baik.
 - 3.1.12 Jujur dalam apa jua keadaan dan situasi.
 - 3.1.13 Mempunyai ilmu pengetahuan berkaitan hukum, ibadah dan asas ilmu fiqh

- 3.1.14 Mengelak dari menggunakan ubat-ubatan atau kaedah terapi yang diharamkan oleh Islam.
- 3.1.15 Sentiasa peka dan mengikuti perkembangan semasa kemajuan sains, pembaharuan dan teknologi perubatan.
- 3.1.16 Menjaga kerahsiaan pesakit sepanjang masa.
- 3.1.17 Mengetahui bahawa mendalami ilmu di dalam Islam mempunyai dua tujuan:-
 - a) Hubungan di antara pengamal perubatan.
 - b) Hubungan pengamal perubatan dengan pesakit.

Hubungan di antara pengamal perubatan:-

- i. Pengamal perubatan adalah saudara kepada setiap pengamal perubatan yang lain dan rakan sejawat di dalam satu misi yang mulia sebagai menyahut seruan Allah.
- ii. Pengamal perubatan bertanggungjawab ke atas penjagaan kesihatan sesebuah negara.
- iii. Pengamal perubatan bertanggungjawab merangka, merancang dan mengambil langkah serta mewujudkan budaya kerja yang berintegriti.
- iv. Pengamal perubatan mesti menghormati rakan sejawatnya.
- v. Pengamal perubatan perlu berkongsi pengalaman, pengetahuan dan kepakaran dengan pengamal perubatan yang lebih muda.
- vi. Pengamal perubatan hendaklah sentiasa bekerjasama dan bersedia membantu antara satu sama lain.
- vii. Pengamal perubatan bertanggungjawab untuk mengadakan rundingan kepada mereka yang lebih pakar jika sesuatu kes perlu dirujuk bagi rawatan lanjut.
- viii. Pengamal perubatan perlu bekerja di dalam satu pasukan.
- ix. Kod etika ini meliputi kesemua peringkat di dalam bidang perubatan dan kesihatan.

Hubungan pengamal perubatan dengan pesakit:-

- i. Segala tindakan yang diambil oleh pengamal perubatan adalah demi kepentingan pesakit.
- ii. Jadual perkhidmatan hendaklah disusun dan disesuaikan dengan pesakit bagi menjaga kebajikan dan keselesaan pesakit.
- iii. Memberi perkhidmatan tanpa mengira latar belakang pesakit.

- iv. Memberi perkhidmatan dengan penuh kesabaran, toleransi dan sikap bertimbang rasa.
- v. Sentiasa mematuhi piawaian profesion sebagai seorang pengamal perubatan.

4. Tanggungjawab dan Liabiliti

- 4.1 Pengamal perubatan muslim telah dididik, lulus dan memenuhi peraturan-peraturan dan undang-undang berkaitan perkhidmatan perubatan dan kesihatan sesuatu negara.
- 4.2 Kes yang rumit dan bermasalah hendaklah dirujuk kepada pakar yang berkaitan.
- 4.3 Seseorang pengamal perubatan hendaklah bertindak sebaik mungkin, tanpa melakukan kecuaiian dalam mengurus sesuatu kes.
- 4.4 Pengamal perubatan bertanggungjawab langsung ke atas pesakitnya. Segala persetujuan atau penolakan pesakit ke atas cadangan rawatan yang disyorkan hendaklah dibuat secara bertulis.

5. Penjagaan Nyawa Manusia

- 5.1 Nyawa manusia wajib dipelihara meliputi kesemua peringkat kehidupan termasuklah janin di dalam rahim. Pengguguran janin dibenarkan dalam keadaan yang mengancam nyawa (alasan perubatan) dan dibenarkan oleh syarak.
- 5.2 Seorang pengamal perubatan tidak boleh mengambil nyawa pesakit dalam keadaan apa sekalipun, walaupun wujudnya permintaan pesakit.
- 5.3 Pengamal perubatan bertanggungjawab memaklumkan kematian seseorang pesakit kepada warisnya.
- 5.4 Pengamal perubatan perlu sentiasa positif dan memotivasikan pesakit walaupun pesakit tidak ada harapan sembuh.
- 5.5 Pengamal perubatan perlu jujur di dalam merawat pesakit dengan kaedah ataupun pendekatan yang sesuai.

6. Pengamal Perubatan dan Masyarakat

- 6.1 Pengamal perubatan adalah sebahagian daripada ahli masyarakat yang berperanan menjaga dan memelihara taraf kesihatan masyarakat.
- 6.2 Pengamal perubatan berperanan penting dalam mengambil langkah-langkah bagi mencegah sesuatu penyakit serta memerangi tabiat manusia yang merosakkan kesihatan.

- 6.3 Pencegahan penyakit juga dapat diatasi melalui pendekatan agama seperti kebersihan hati, mengawal dan menjauhkan diri daripada merosakkan diri sendiri dan orang lain; serta amalan gaya hidup sihat.
- 6.4 Pengamal perubatan perlu membuktikan kepercayaan masyarakat yang telah diberikan kepada mereka. Pengamal perubatan wajar diambil tindakan sekiranya mereka melanggar undang-undang dalam bidang profesinya demi menjaga nama baik dalam amalan perubatan.

7. Pengamal Perubatan dan Kemajuan Biomedikal Moden

- 7.1 Islam tidak menghalang melakukan penyelidikan sama ada kajian akademik atau kajian gunaan yang bertujuan untuk menyelesaikan sesuatu masalah.
- 7.2 Kebebasan penyelidikan sains diharuskan selagi mana ia tidak merosakkan dan membawa kemudaratan kepada manusia serta penganiayaan atau penyeksaan ke atas haiwan.
- 7.3 Profesion perubatan perlu dilibatkan bersama dalam rumusan dan pengeluaran fatwa untuk memastikan kesahihan hasil kajian.
- 7.4 Garis panduan mengenai perkara baru yang tidak disebut di dalam hukum atau mana-mana rujukan boleh dihasilkan selagi mana ia tidak bertentangan dengan al-Quran dan al-Sunnah.

Pengamal perubatan bertanggungjawab mendidik masyarakat, termasuk menggariskan peraturan mengenai prosedur, kaedah, pengurusan rawatan serta menentukan polisi keutamaan peraturan tersebut seperti dalam pendermaan darah dan pendermaan organ.

8. Pendidikan Perubatan

- 8.1 Pendidikan perubatan adalah satu bidang ilmu bagi melatih dan menghasilkan pengamal perubatan yang boleh menyumbang bakti kepada agama, bangsa dan negara semata-mata untuk mendapat keredhaan Allah.
- 8.2 Pendidik ilmu perubatan hendaklah menunjukkan teladan yang baik, memberi pengajaran dan bimbingan serta perhatian yang berterusan kepada pelajarannya.
- 8.3 Kod Etika Perubatan Dalam Islam wajar dimasukkan ke dalam sukatan kurikulum perubatan. Kurikulum perubatan juga perlu memberi penekanan kepada perkara-perkara seperti berikut:
 - 8.3.1 Menekankan bahawa amalan perubatan adalah satu ibadah.
 - 8.3.2 Menjelaskan hukum-hakam dan ibadah yang berkaitan dengan pelbagai masalah kesihatan.
 - 8.3.3 Memberi kefahaman berkaitan warisan perubatan dan sains

tamadun Islam bagi mengembalikan zaman kegemilangannya.

- 8.3.4 Memberi penekanan bahawa keikhlasan merupakan elemen utama di dalam memberikan kesembuhan, pengubatan, menghilangkan tekanan dan sebagai pemangkin ke arah pemulihan kesihatan.

9. Peraturan Mendapatkan Laporan Perubatan Pesakit

- 9.1 Permohonan untuk mendapatkan laporan perubatan pesakit boleh dibuat kepada pengamal perubatan yang berkaitan, oleh pihak-pihak berikut:
 - 9.1.1 Pesakit;
 - 9.1.2 Seseorang yang telah diberikan kebenaran bertulis untuk memohon bagi pihak pesakit, lazimnya waris pesakit;
 - 9.1.3 Jika pesakit adalah seorang kanak-kanak, seseorang yang mempunyai hak penjagaan ke atas pesakit tersebut;
 - 9.1.4 Bagi pesakit yang tidak berupaya untuk mengurus perihal dirinya, sesiapa sahaja yang dilantik oleh mahkamah untuk menguruskan perihal pesakit tersebut ;
 - 9.1.5 Bagi pesakit yang telah meninggal dunia; saudara-mara, waris atau wakil peribadi pesakit.
- 9.2 Pesakit atau pemohon tiada akses kepada rekod perubatan kecuali maklumat dalam rekod perubatan boleh diperolehi melalui permohonan laporan perubatan. Laporan perubatan disiapkan dalam tempoh 2 hingga 4 minggu bergantung kepada jenis hospital setelah suatu permohonan lengkap diterima, bagi hospital dan institusi khas perubatan KKM. Bayaran bagi penyediaan laporan perubatan perlu ditanggung oleh pemohon.
- 9.3 Jika terdapat maklumat dalam laporan perubatan yang ditulis dalam terma-terma yang tidak difahami oleh pesakit atau pemohon, suatu penjelasan hendaklah disediakan setelah pemohon membuat permohonan laporan penjelasan kepada laporan perubatan yang beliau terima.
- 9.4 Sekiranya permohonan laporan perubatan dibuat oleh pesakit yang merupakan seorang kanak-kanak, akses tidak boleh diberikan melainkan permohonan melalui ibu bapa, penjaga atau waris dengan pembuktian pertalian ahli keluarga.
Sekiranya permohonan dibuat oleh seseorang yang bukan pesakit, pengamal perubatan mestilah memastikan sama ada:
 - 9.4.1 Pesakit telah membenarkan permohonan tersebut dibuat atau
 - 9.4.2 Sekiranya pesakit tidak berupaya untuk memberi kebenaran permohonan dibuat, akses tersebut merupakan usaha ke arah kebaikan pesakit juga.
- 9.5 Sekiranya seseorang berpendapat bahawa maklumat yang terkandung di

dalam laporan perubatan yang diberikan adalah tidak tepat, maka permohonan boleh dibuat kepada pengamal perubatan untuk melakukan pembetulan atau laporan penjelasan di mana perlu.

Bagi permohonan seperti di atas, pengamal perubatan perlu:-

- 9.5.1 Melakukan pembetulan di mana perlu sekiranya pengamal perubatan berpuas hati bahawa maklumat yang ada adalah tidak tepat.
- 9.5.2 Membuat catatan dalam bahagian rekod yang mengandungi maklumat di mana maklumat tersebut dianggap tidak tepat, sekiranya pengamal perubatan tidak berpuas hati; dan
- 9.5.3 Dalam kedua-dua kes, memberikan satu salinan laporan penjelasan kepada pemohon tanpa sebarang bayaran.

10. Tugas Pengamal Perubatan Semasa Perang

- 10.1 Seorang pengamal perubatan muslim hendaklah menjaga dan mengubati orang yang sakit walau apa keadaan sekalipun.
- 10.2 Pengamal perubatan muslim tidak boleh mengkhianati atau mencederakan pesakit tanpa mengira latar belakang pesakit.
- 10.3 Penyampaian perkhidmatan rawatan dan pengubatan mencakupi kawan atau musuh tanpa memilih kasih.